

**საქართველოს საპატრიარქოს  
წმინდა ტბელ აბუსერისძის სახელობის სასწავლო უნივერსიტეტის  
შრომის უსაფრთხოების მართვის წესი და მექანიზმები**

**წინამდებარე წესის მიზანი**

ა(ა)იპ წმინდა ტბელ აბუსერისძის სახელობის სასწავლო უნივერსიტეტის (შემდგომში „უნივერსიტეტის“) შრომის უსაფრთხოების სისტემის მართვის გეგმის მიზანია უზრუნველყოფილ იქნას უსაფრთხო სასწავლო/სამუშაო გარემო, დაცულ იქნას პერსონალი, სტუდენტები და ვიზიტორები, თავიდან იქნას აცილებული უბედური შემთხვევები და საშიში ინციდენტები.

წინამდებარე წესი „შრომის უსაფრთხოების შესახებ“ საქართველოს ორგანული კანონის საფუძველზეა შედგენილი და შესაბამისობაშია საქართველოს კანონმდებლობასთან.

**თავი I. შრომის უსაფრთხოების პოლიტიკა**

საქართველოს კონსტიტუციის თანახმად, საქართველოს სახელმწიფო და კერძო სექტორი ცნობს და იცავს საყოველთაოდ აღიარებულ უფლებებსა და თავისუფლებებს, როგორც წარუვალ და უზენაეს ადამიანურ ღირებულებებს. შრომის უფლების განხორციელება ჩვენს ყოველდღიურ ცხოვრებაში გვევლინება, როგორც ერთ-ერთი ეფექტური საშუალება საზოგადოების მატერიალური კეთილდღეობის უზრუნველსაყოფად. განსაკუთრებით მნიშვნელოვანია, რომ ადამიანებმა შეძლონ შრომის უფლების განხორციელება და ეს უფლება ექვემდებარებოდეს იმ შეზღუდვებს, რომელიც აუცილებელია დემოკრატიულ საზოგადოებაში და რომლებიც უზრუნველყოფენ უსაფრთხო და კომფორტულ სამუშაო გარემოს. ადამიანის უფლებათა საერთაშორისო სამართლის კვალდაკვალ ვითარდება შრომის უსაფრთხოების სტანდარტებიც. დღეს საქართველოში ადამიანთა უფლებების დაცვის პრინციპები, საზოგადოებრივი უსაფრთხოების ინტერესები, საჯარო წესრიგი, ჯანმრთელობისა და შრომის უსაფრთხოების დაცვა ერთ-ერთ ყველაზე მნიშვნელოვან პრიორიტეტადაა მიჩნეული.

„უნივერსიტეტი“ მიზანად ისახავს უზრუნველყოს ყველა თანამშრომლის, სტუდენტის/პროფესიული სტუდენტის, კონტრაქტორისა და სტუმრის უსაფრთხო გარემო, განავითაროს შრომის უსაფრთხოების სისტემა საერთაშორისო სტანდარტების და საქართველოს კანონმდებლობის შესაბამისად.

„უნივერსიტეტი“ უზრუნველყოფს ნებისმიერ მომხმარებელთან და ასოცირებულ პირთან ერთად ყველა არსებული სამსახურეობრივი რისკებისა და ზემოქმედების მინიმალიზაციას და თავიდან აცილებას. უზრუნველყოფს ადამიანების, ქონების, გარემოს და შრომის უსაფრთხოების სტანდარტების დაცვას.

„უნივერსიტეტი“ ყველა თანამშრომლისა და სტუდენტისგან/პროფესიული სტუდენტისაგან მოითხოვს ჯანმრთელობის, შრომის უსაფრთხოების და გარემოს დაცვის წესების და პროცედურების უპირობო დაცვას

### **1. შრომის უსაფრთხოების სისტემის მართვა, დამსამქებლისა და დასაქმებულის ვალდებულებები და პასუხისმგებლობები**

შრომის უსაფრთხოების მიმართულების პასუხისმგებელ პირებად განისაზღვრონ შრომის უსაფრთხოების სპეციალისტები.

შრომის უსაფრთხოებაზე პასუხისმგებელი პირი მოქმედებს საქართველოს კანონის შრომის უსაფრთხოების შესახებ, შრომის უსაფრთხოების შესახებ დებულებით, ამ სფეროში არსებული სანაწარმოებლო აქტებით და ინსტრუქციებით. ასევე, იგი აკონტროლებს უნივერსიტეტის უსაფრთხოების სისტემას, შეიმუშავებს სამუშაო ადგილზე საჭირო უსაფრთხოების ინსტრუქციებს და აცნობს მომუშავე პერსონალს, ასევე აკონტროლებს ამ მოთხოვნების შესრულებას.

### **2. შრომის უსაფრთხოების ზოგადი მოთხოვნები**

1. უნივერსიტეტში სამუშაოდ დაიშვებიან 18 წელს მიღწეული პირები, რომელთაც აქვთ შესაბამისი ცოდნა და უნარები და გავლილი აქვთ შესაბამისი სწავლება უსაფრთხოების წესებში.
2. აკრძალულია ალკოჰოლისა და ნარკოტიკული საშუალებების მიღება და არაფხიზელ მდგომარეობაში, ნარკოტიკული ზემოქმედების ქვეშ მყოფი პირის დაშვება.
6. ტრამვის, უბედური შემთხვევის, პროფესიული დაავადების შესახებ დაუყოვნებლივ უნდა ეცნობოს სასწრაფო დახმარების სამსახურს, უშუალო უფროსს.
7. მომეტებული საფრთხის დროს, უნდა ეცნობოს ხელმძღვანელობას და შრომის უსაფრთხოების სპეციალისტს.
8. დასამქებულმა ყველა სახის ინსტრუმენტი უნდა გამოიყენოს მხოლოდ საჭიროებისა და დანიშნულების შესაბამისად.

### **3. შრომის უსაფრთხოების მოთხოვნების შესრულებასთან დაკავშირებული პასუხისმგებლობები**

„უნივერსიტეტის“ პერსონალისა და სტუდენტების უსაფრთხოებაზე პასუხისმგებელი უშუალოდ არიან უნივერსიტეტის ადმინისტრაცია და შრომის უსაფრთხოების სპეციალისტები.

#### **4. თანამშრომელთა ჩართულობა**

უნივერსიტეტის დასაქმებულებსა და მათ წარმომადგენლებს აქვთ შესაძლებლობა, დრო და რესურსები, რათა მონაწილეობა მიიღონ შრომის უსაფრთხოების საკითხების შეფასებაში და ჩართული იყვნენ უსაფრთხო სამუშაო გარემოს შექმნის, უსაფრთხოების საკითხების განხორციელების და ტრენინგების პროცესებში.

„უნივერსიტეტი“:

1. ზრუნავს, რომ საფრთხის არსებობისას დასაქმებულისა და სამუშაო სივრცეში მყოფი სხვა პირის უსაფრთხოებასა და ჯანმრთელობას ზიანი არ მიადგეს.
2. დასაქმებულთა ჯანმრთელობისთვის ზიანის მიყენების რისკის შესამცირებლად ან აღმოსაფხვრელად ახორციელებს პრევენციულ ღონისძიებებს, აფასებს რისკებს, ზრუნავს საფრთხის შემცველი ფაქტორების შემცირებასა და აღმოფხვრაზე.
3. უზრუნველყოფს წარმოებას პირველადი დახმარების საშუალებებით.
4. სათანადო დონეზე უზრუნველყოფს სამუშაო სივრცეში სანიტარიულ-ჰიგიენური მოთხოვნების დაცვას.
5. უზრუნველყოფს პერსონალისთვის შესაბამისი სწავლების ჩატარებას.
6. სამუშაო პროცესში პერსონალისათვის ზიანის მიყენების შემთხვევაში უზრუნველყოფს ზიანის ანაზღაურებას.
7. უზრუნველყოფს ყველა თანამშრომლის უბედურ შემთხვევაზე დაზღვევას.

#### **5. შრომის უსაფრთხოების სპეციალისტი**

შრომის უსაფრთხოების სპეციალისტის ძირითადი მოვალეობაა უსაფრთხოების მოთხოვნების, წესებისა და პროცედურების დანერგვა და კონტროლი, შრომის უსაფრთხოების სპეციალისტი ანგარიშვალდებულია უნივერსიტეტის რექტორის წინაშე.

შრომის უსაფრთხოების სპეციალისტი პასუხისმგებლობა მოიცავს შემდეგს:

1. შეიმუშაოს და დანერგოს ჯანმრთელობისა და უსაფრთხოების დაცვის პროცედურები, წესები და მოთხოვნები და მოახდინოს მათი პერიოდული განახლება;
2. უზრუნველყოს აღნიშნული საკითხების შესრულების მონიტორინგი;
3. მუდმივად იზრუნოს უსაფრთხოების სისტემის გაუმჯობესებაზე;
4. უზრუნველყოს სამუშაო ადგილზე არსებული რისკების შეფასება, საფრთხეების იდენტიფიცირება და მაკონტროლებელი/პრევენციული ღონისძიებების დაგეგმვა;
5. უზრუნველყოს თანამშრომლებისთვის ტრენინგის ჩატარება, სამუშაოს სპეციფიკიდან გამომდინარე თემების შერჩევით;
6. აწარმოოს ინდიცენტის მოკვლევა, მისი გამომწვევი მიზეზის დადგენით, და უზრუნველყოს პრევენციული ზომების შემუშავება ინციდენტის განმეორების თავიდან აცილების მიზნით;

7. დაესწროს სამუშაო შეხვედრებს (თათბირებს) და უზრუნველყოს არსებული უსაფრთხოების საკითხების განხილვა მათი დროული და ეფექტური გადაჭრის მიზნით;
8. მომსახურე პერსონალსაუხსნას უსაფრთხოების მოთხოვნების დაცვის აუცილებლობა;
9. შეამოწმოს ობიექტის უსაფრთხოებისათვის განკუთვნილი ინვენტარის გამართული მდგომარეობა და დროულად უზრუნველყოს სამუშაო პროცესის საჭირო ინვენტარით აღჭურვის ორგანიზება;
10. გაუწიოს პირველადი დახმარება დაზარალებულს, შეაფასოს მისი მდგომარეობა და მენეჯმენტთან კონსულტაციით მოახდინოს დაზარალებულის უახლოეს საავადმყოფოში გადაყვანის ორგანიზება;
11. ჩაატაროს პრაქტიკული მეცადინეობები, სტაციონარში გადაყვანის საჭიროებისას მისი ეფექტურად განხორციელებისათვის;

## **6. დასაქმებულთა მოვალებები**

დასაქმებული ვალდებულია:

1. იხელმძღვანელოს ამ წესით, უსაფრთხოებასთან დაკავშირებული სხვა ინსტრუქციებით და დაემორჩილოს დამსაქმებლის მიერ დადგენილ სამუშაო პროცედურებს;
2. შეასრულოს სამუშაო, მართოს და გამოიყენოს სამუშაო ტექნიკა, მასალები, საშიში ნივთიერებები და სხვა საშუალებები დადგენილი წესების მიხედვით, ტრენინგებზე და მუშაობისას მიღებული ცოდნისა და კვალიფიკაციის შესაბამისად;
4. ინდივიდუალური დაცვის საშუალებები გამოიყენოს ინსტრუქციების შესაბამისად, შეინახოს მუშა მდგომარეობაში და დააბრუნოს მათთვის განკუთვნილ ადგილზე;
5. დაიცვას შრომის უსაფრთხოების მთავარი სპეციალისტი, ექიმის და უშუალო ხელმძღვანელის მითითებები და რეკომენდაციები უსაფრთხოებასთან დაკავშირებულ საკითხებზე;
6. არ გამოცხადდეს სამუშაოზე ალკოჰოლური, ნარკოტიკული, ტოქსიკური ან ფსიქოტროპული სიმთვრალის მდგომარეობაში და სამუშაოს შესრულებისას არ მოიხმაროს ასეთი მდგომარეობისგამომწვევი ნივთიერებები;
7. გონივრული ეჭვის არსებობისას გაიაროს შემოწმება იმის დასადგენად, იმყოფება თუ არა ალკოჰოლური, ნარკოტიკული ან ფსიქოტროპული სიმთვრალის მდგომარეობაში;
8. დაემორჩილოს სამუშაო სივრცეში თამბაქოს მოხმარების შესახებ აკრძალვებს;
9. თავისი შესაძლებლობის ფარგლებში, იზრუნოს საკუთარი და ასევე, იმ პირების უსაფრთხოებისა და ჯანმრთელობის დაცვაზე, რომლებსაც საკუთარი მოქმედებით ან უმოქმედობით ზიანი მიადგათ.

## **7. ნარკოტიკებისა და ალკოჰოლის პოლიტიკა**

1. უნივერსიტეტი აცხადებს ნულოვან ტოლერანტობას ნარკოტიკებისა და

ალკოჰოლის მოხმარების მიმართ და მკაცრად დაიცავს ამ მოთხოვნას.

2. ნებისმიერი თანამშრომლის ან კონტრაქტორის მიმართ, რომელიც ფლობს, ყიდის, იღებს, ზემოქმედების ქვეშაა, ან შემოწმებისას აღმოჩნდება ალკოჰოლის ან ნარკოტიკის ზემოქმედების ქვეშ, დაუყოვნებლივ განხორციელდება დისციპლინური ზომები, ის დატოვებს სამუშაო ტერიტორიას/ოფისს და დადგება მისი შრომითი კონტრაქტის შეწყვეტის საკითხი.
3. ნებისმიერ თანამშრომელს ან კონტრაქტორს, რომელიც სამუშაოსთან დაკავშირებული ინციდენტის დროს სამსახურშია, ან „უნივერსიტეტის“ აღჭურვილობას იყენებს, შეიძლება ჩაუტარდეს ნარკოტიკების/ალკოჰოლის დონის შემოწმება, რომელიც ჩატარდება მაშინ, როცა ამას „უნივერსიტეტი“ ჩათვლის საჭიროდ.
4. „უნივერსიტეტი“ იტოვებს უფლებას ჩატარდეს ალკოჰოლის და ნარკოტიკების მოხმარების შემთხვევითი შემოწმებები იმ თანამშრომლებსა და კონტრაქტორებთან, რომლებიც უსაფრთხოებასთან დაკავშირებულ ფუნქციებს ასრულებენ, მაგალითად, მართავენ უნივერსიტეტის კუთვნილ სატრანსპორტო საშუალებას ან ასრულებენ სავსელ სამუშაოებს. გარდაამისა, „უნივერსიტეტის“ ადმინისტრაცია იტოვებს უფლებას წინასწარი გაფრთხილების გარეშე ჩაუტაროს პერსონალს ნარკოტიკებისა და ალკოჰოლის შემოწმებები. „უნივერსიტეტი“ უფლებამოსილია მოთხოვოს თანამშრომელს ან კონტრაქტორს ნარკოტიკების/ალკოჰოლის ტესტის ჩატარება, თუ გაჩნდა საფუძვლიანი ეჭვი, რომ მან დაარღვია ალკოჰოლის ან/და სხვა ნივთიერების მიღების აკრძალვის წესი, რაც აშკარა ხდება ამ ადამიანის გარეგნობაზე, ქცევაზე, მეტყველებაზე, სუნზე ან სხვა სახის დაკვირვებით.
5. ყველა თანამშრომელი და სტუდენტი/პროფესიული სტუდენტი ვალდებულია, გონივრული ეჭვის არსებობისას „უნივერსიტეტის“ ადმინისტრაციის, უფლებამოსილი პირის/პირების მოთხოვნის შემთხვევაში გაიაროს შემოწმება იმის დასადგენად, იმყოფება თუ არა ალკოჰოლური, ნარკოტიკული ან ფსიქოტროპული სიმთვრალის მდგომარეობაში.
6. კონტრაქტორებმა და თანამშრომლებმა, რომლებიც იღებენ ექიმის დანიშნულ მედიკამენტებს, უნდა გააფრთხილონ შესაბამისი პირები ამ მედიკამენტების მიღების პირობებისა და გვერდითი მოვლენების შესახებ. შესაძლებელია, ზოგიერთ წამალს არასასურველი ეფექტი ჰქონდეს, რაც რისკს შეუქმნის და საფრთხეში ჩააგდებს სხვა კონტრაქტორებს. დასაშვებია პერიოდულად ჩატარდეს „უნივერსიტეტის“ სამუშაო ადგილებზე შესული და გამოსული ადამიანების გაუფრთხილებელი შემოწმებები, რომლებსაც უნივერსიტეტის ადმინისტრაციის უფლებამოსილი წარმომადგენელი ჩაატარებს.

## **8. კონტრაქტორებთან ურთიერთობის პოლიტიკა**

1. კონტრაქტორი ორგანიზაციის შერჩევისას ერთ-ერთი მთავარი კრიტერიუმია შრომის

უსაფრთხოების გამართული სისტემის არსებობა. უნივერსიტეტის მიერ უზრუნველყოფილია, რომ კონტრაქტორის ვალდებულებებში მკაფიოდ და მკაცრად იყოს განსაზღვრული შრომის უსაფრთხოების შესახებ ორგანული კანონით დადგენილი მოთხოვნები. კონტრაქტორთან მუშაობისას, პროცესების მენეჯმენტი მოიცავს შრომის უსაფრთხოების სისტემის მონიტორინგისა და კონტროლის ეფექტურ მექანიზმებს.

2. „უნივერსიტეტის“ შრომის უსაფრთხოებაზე პასუხისმგებელი პირები კონტროლს გაუწევენ, რათა „უნივერსიტეტის“ ტერიტორიაზე კონტრაქტორებმა მკაცრად დაიცვან შრომის უსაფრთხოების ნორმები. საჭიროების შემთხვევაში მისცემენ კონტრაქტორს მითითებებს შრომის უსაფრთხოების მიმართულებით.

## თავი II. უსაფრთხოების ზოგიერთი პროცედურა

შრომითი უსაფრთხოების პროცედურა მოიცავს:

### 1. ეკიპირება

- 1.1. სამუშაო სივრცეში საფრთხოს შემცველი სამუშაოებისას, პერსონალი უნდა იყოს უზრუნველყოფილი შესაბამისი პირადი დაცვის საშუალებებით. ტერიტორიაზე სამშენებლო და საინჟინრო-ტექნიკური სამუშაოების განხორციელებისას ყველა პიროვნება უნდა იყოს ეკიპირებული სათანადო აღჭურვილობით: ჩაფხუტით, უსაფრთხოების ფეხსაცმლით, რეფლექტორიანი ჟილეტით, სათვალის, ხელთათმანით, ხოლო სამუშაოების სპეციფიკიდან გამომდინარე ისინი ეკიპირებულები უნდა იყვნენ დამატებითი აღჭურვილობით: უსაფრთხოების ქამრით, სახის დამცავი ფარით, ხმაურისგან დამცავი ყურის საცობებით, რესპირატორით, სპეც. ხელთათმანებით;
- 1.2. სათვალის ტარება სავალდებულოა, როდესაც არის თვალის დაზიანების რისკი. ცალკეულ შემთხვევებში კი აუცილებელია სახის დამცავი ფართალჭურვა;
- 1.3. მომწამვლელ ნივთიერებებთან ურთიერთობისას, პერსონალი, აღჭურვილი უნდა იყოს: სპეციალური ხელთათმანით, რესპირატორით, სათვალის, ფართუკით (საჭიროების შემთხვევაში) და სახის დამცავი ფარით;
- 1.4. რესპირატორებით აღჭურვა უნდა მოხდეს ყველა იმ მასალასთან ურთიერთობისას, რომელიც გამოიწვევს სასუნთქი ორგანოების დაზიანებას, ასევე ყველა იმ სამუშაოს წარმოებისას რის შედეგადაც წარმოიქმნება მტვერი ან სხვა ადამიანის ჯანმრთელობისათვის მავნე ნივთიერება;
- 1.5. ნიღბებისა და სხვა სანიტარულ-ჰიგიენური დაცვის საშუალებების ტარება აუცილებელია ეპიდემიოლოგიური საფრთხის არსებობისას.

## 2. ელექტრო უსაფრთხოება

2.1. ელექტრო ქვესადგურები და გამანაწილებელი ყუთები რომლებიც განთავსებულია უნივერსიტეტის ტერიტორიაზე უნდა იყოს ტექნიკურად გამართული, დაკეტილ მდგომარეობაში და მომსახურეობას უწევდეს სერთიფიცირებული სპეციალისტი;

2.2. პერიოდულად უნდა მოწმდებოდეს ელ. სადენების და ჩამრთველების მდგომარეობა; ელექტრო სისტემას უნდა ჰქონდეს ცენტრალური ავარიული გამომრთველი, რომელიც ავარიული სიტუაციის დროს გათიშავს ელ. ენერგიას მთელს ტერიტორიაზე, რაც ამცირებს ცეცხლის გაჩენისა და ელექტროობისგან მიყენებული ზიანის საფრთხეს;

2.3. დაუშვებელია:

- ✓ ელექტრო მოწყობილობის დამცავი შემოდლობის შიგნით შესვლა;
- ✓ ელექტრო სადენებთან, მომჭერებთან და სხვა ადვილად ხელმისაწვდომ დენგამტარ ნაწილებთან შეხება;
- ✓ არასტანდარტული ელექტროგამათბობელი მოწყობილობის გამოყენება;
- ✓ ღია გამათბობელი ელემენტების მქონე მოწყობილობით სარგებლობა და მათი უყურადღებოდ დატოვება ჩართულ მდგომარეობაში;
- დაზიანებული ჩამრთველების, ავტომატური გამომრთველების და როზეტების გამოყენება;
- ✓ მწყობრიდან გამოსული ელექტრომოწყობილობის, ელექტროდანადგარების და ელექტროინსტრუმენტის რემონტის დამოუკიდებლად შესრულება.

2.4. ელექტროსამონტაჟო სამუშაოები

- ✓ ნებისმიერ ელექტროსამონტაჟო სამუშაოთა შესრულების დროს, უნდა განხორციელდეს გაუთვალისწინებელი ჩართვის (წრედის დამცველები უნდა მოიხსნას) ან გამორთვის თავიდან აცილების ღონისძიებები;
- ✓ ელექტრული წრედისა და აპარატურის გამოსაცდელად დენის მიწოდებისას საჭიროა დაცული იქნეს შესაბამისი წესები;
- ✓ კაბელური ხაზების გაყვანისას საჭიროა დაცული იქნეს კაბელების გაყვანის პროექტით გათვალისწინებული წესები. ექსპლუატაციაში მყოფი კაბელის გაყვანა დასაშვებია მხოლოდ მისი გამორთვისა და დამიწების შემდეგ;
- ✓ ელექტროგადამცემი ხაზების მონტაჟისას, სავალდებულოა ელექტროგადამცემი ხაზების დამონტაჟებული უბნების დამიწება.

2.5. დახურულ (შეზღუდულ) სივრცეში მუშაობა

- ✓ დახურული, შეზღუდული სივრცე არის ნებისმიერი სივრცე რომელსაც შეზღუდული აქვს შესასვლელი და გამოსასვლელი და არ არის განკუთვნილი ადამიანის განთავსებისათვის და/ან პოტენციურად შეიცავს ატმოსფერულ ან სხვა სახის დაზიანების საფრთხეს. (მაგ. რეზერუარები, ავზები, მილები, ორმოები და

ტრანშეები რომლების სიღრმე აღემატება 1.6 მეტრს);

- ✓ დახურული სივრცის რისკის ფაქტორების შეფასების შემდეგ, საჭიროების შემთხვევაში უნდა მოხდეს მასში შესვლამდე, სხვადასხვა ტექნიკური საშუალებებით გაზის ან სხვა ჯანმრთელობისთვის საშიში აირების შემოწმება;
- ✓ დახურულ (შეზღუდულ) სივრცეში შესვლამდე დანადგარები/სარქველები და ა.შ. საჭიროებისამებრ უნდა იქნეს იზოლირებული და გამორთული.

### 3. ნარჩენების მართვა

- 3.1. „უნივერსიტეტის“ ობიექტებზე ნარჩენების მართვა ხორციელდება საერთაშორისო სტანდარტების და „ნარჩენების მართვის კოდექსი“-ს მოთხოვნების საფუძველზე და საჭიროებისამებრ აღნიშნული კანონის მე-14 მუხლის პირველი პუნქტის შესაბამისად;
- 3.2. ობიექტზე დროულად უნდა ხდებოდეს ნარჩენებისა და ნაგვის შეგროვება და წინასწარ განსაზღვრულ ადგილებზე მოთავსება;
- 3.3. ყველაფერი, რამაც შეიძლება ზიანი მოუტანოს გარემოს, მაგალითად მტვერი, ქიმიური ნარჩენები და ა.შ. უნდა მოთავსდეს სპეციალური გამოყოფილ ბუნკერებში. ბუნკერებმა ხელი უნდა შეუშალოს ზემოთ აღნიშნული ნივთიერებების გარემოში გავრცელებას;
- 3.4. ნაგვის გადატანა უნდა მოხდეს უსაფრთხოდ, ავტოტრანსპორტით, ქალაქის მუნიციპალიტეტის მიერ განსაზღვრულ ნაგავსაყრელებზე;

### 4. სიმაღლეზე მუშაობა

- 4.1. თუ სამუშაოს განხორციელება ხდება 2 მეტრზე მაღლა სამუშაო მოედანთან მიმართებით, ასეთი სამუშაო ითვლება მაღლივ სამუშაოდ და მოქმედებას იწყებს შესაბამისი პროცედურა;
- 4.2. მაღლივი სამუშაოს შემსრულებელი აღჭურვილი უნდა იყოს ვარდნის საწინააღმდეგო დამცავი ქამრით. (ერთი ან ორი კაუჭიანი ტროსით);
- 4.3. ვარდნის საწინააღმდეგო დამცავი ქამრი უნდა იყოს შემოწმებული „უნივერსიტეტის“ შრომის უსაფრთხოების წარმომადგენლის მიერ;
- 4.4. დამჭერი ტროსები და ჩასაბმელი კაუჭები უნდა იყოს გამართული, კარგ მდგომარეობაში და შემოწმებული „უნივერსიტეტის“ შრომის უსაფრთხოების წარმომადგენლის მიერ.

### თავი III. სახანძრო უსაფრთხოების წესი

წინამდებარე წესი შემუშავებულია „სამოქალაქო უსაფრთხოების შესახებ“ საქართველოს კანონის, „სახანძრო უსაფრთხოების წესებისა და პირობების შესახებ ტექნიკური რეგლამენტის დამტკიცების თაობაზე“ საქართველოს მთავრობის 2015 წლის 23 ივლისის №370 დადგენილების საფუძველზე.

#### 5. ხანძარსაწინააღმდეგო უსაფრთხოების უზრუნველყოფა

1. სახანძრო უსაფრთხოების წესების დაცვაზე მონიტორინგს ახორციელებს და წინამდებარე წესით დადგენილი ღონისძიებების შესრულება ევალება „უნივერსიტეტის“ შრომის უსაფრთხოების სამსახურს.
2. „უნივერსიტეტის“ შენობებში თვალსაჩინო ადგილას გამოკრულია საევაკუაციო გეგმა, ევაკუაციის პროცედურები, რომლის შესაბამისად საჭიროების შემთხვევაში მოხდება შენობის უსაფრთხოდ დატოვება.
3. ხანძარსაწინააღმდეგო დაცვის სისტემების ტექნიკური საშუალებების ეფექტური მუშაობის უზრუნველსაყოფად „უნივერსიტეტის“ რექტორი ნიშნავს ხანძარსაწინააღმდეგო დაცვის სისტემების ექსპლუატაციაზე, ტექნიკურ მომსახურებაზე, მათ შეკეთებაზე, დაცვასა და გამოყენებისათვის მზადყოფნაზე პასუხისმგებელ პირს.
4. უნივერსიტეტის რექტორი განსაზღვრავს ხანძრის ჩაქრობის პირველადი საშუალებების შენახვასა და მოქმედებისთვის მზადყოფნაზე პასუხისმგებელ პირს.
5. სახანძრო უსაფრთხოების უზრუნველყოფაზე პასუხისმგებელი პირები ვალდებული არიან დროულად და სათანადოდ უზრუნველყონ სახანძრო უსაფრთხოების მოთხოვნების შესრულება.
6. პასუხისმგებლობა წინამდებარე წესით დადგენილი სახანძრო უსაფრთხოების მოთხოვნების დაცვაზე უშუალოდ სამუშაო ადგილებზე ეკისრებათ „უნივერსიტეტის“ თანამშრომლებს.
7. თანამშრომლები, რომლებსაც ევალებათ „უნივერსიტეტის“ ხალხმრავალი ღონისძიებების ჩატარება, ვალდებული არიან ღონისძიებების დაწყებამდე ყურადღებით დაათვალიერონ სათავსები და დარწმუნდნენ მათ უსაფრთხოებაში ხანძარსაწინააღმდეგო თვალსაზრისით.
8. „უნივერსიტეტის“ ყველა თანამშრომელი ვალდებულია:
  - ა) დაიცვას სახანძრო უსაფრთხოების მოთხოვნები;
  - ბ) სამუშაოს დასრულების შემდეგ გამორთოს პერსონალური კომპიუტერი ან/და სხვა ელექტროხელსაწყოები;

- გ) სამუშაოს დამთავრების შემდეგ ოთახის დაკეტვის წინ ჩაატაროს დათვალიერება, გამორთოს ელექტროხელსაწყოები და განათება;
- დ) დაიცვას უსაფრთხოების ზომები ადვილადააღებადი და წვადი სითხეების და აირების, სხვა ხანძარსაშიში ნივთიერებების, მასალების და მოწყობილობების გამოყენებით სამუშაოების შესრულებისას;
- ე) იცოდეს ხანძრის დროს ევაკუაციის გეგმა და ცეცხლმაქრების განთავსებისადგილები;
- ვ) იცოდეს ცეცხლმაქრებით სარგებლობის ხერხები;
- ზ) არ ჩახერგოს საევაკუაციო გზები და გასასვლელი.

**9. თანამშრომლებს ეკრძალებათ:**

- ა) სათავსებში ადვილადააღებადი, წვადი და ფეთქებადი ნივთიერებების შენახვა;
- ბ) თამბაქოს მოწევა „უნივერსიტეტის“ ტერიტორიაზე;
- გ) „უნივერსიტეტის“ შენობაში ქალაქლების ან სხვა ადვილად ააღებადი ნივთიერებების ღია მდგომარეობაში დაყრა;
- დ) „უნივერსიტეტში“ ღია ცეცხლის გამოყენება;
- ე) არაქარხნული წესით დამზადებული და გაუმართავი ელექტროხელსაწყოებისა და ელექტროინსტრუმენტების გამოყენება;
- ვ) ქსელში ჩართული ელექტროხელსაწყოების უმეთვალყურეოდ დატოვება.

**10. უსაფრთხოების განყოფილების თანამშრომელთა ვალდებულება**

1. ხანძრის გაჩენის შემთხვევაში უსაფრთხოების სამსახურის თანამშრომელთა მოქმედებები უნდა იყოს მიმართული ადამიანთა უსაფრთხოების უზრუნველყოფასა და მათ დროულ ევაკუაციაზე.
2. სახანძრო უსაფრთხოების უზრუნველყოფისთვის უსაფრთხოების სამსახურის ყველა თანამშრომელი ვალდებულია:
  - ა) იცოდეს ელექტროენერჯის მოწოდების წყარო, მისი საერთო გამომრთველის ადგილმდებარეობა, ხოლო ხანძრის ან ასეთის წარმოქმნის საშიშროების შემთხვევაში, დაუყონებლივ გათიშოს ელექტროენერჯის მოწოდების წყარო.
  - ბ) იცოდეს ცეცხლმაქრი სისტემების გამოყენება, მათი ვარგისიანობის ვადა და შევსების დრო, ასევე პერიოდულად უნდა ამოწმებდეს ცეცხლმაქრების მდგომარეობას.
  - გ) მონაწილეობა მიიღოს ხანძარსაწინააღმდეგო ინსტრუქტაჟის პროცესში.
  - დ) შენობიდან გასვლის წინ შეამოწმოს უნივერსიტეტის მთლიანი შენობა, გამორთოს ელექტროენერჯია, გამართულ მდგომარეობაში დატოვოს სიგნალიზაცია.
  - ე) ხანძრის გაჩენის შემთხვევაში, მათი მოქმედება მიმართული უნდა იყოს ადამიანთა უსაფრთხოების უზრუნველყოფასა და მათ დროულ ევაკუაციაზე; დროულად მიუთითოს ადამიანებს საევაკუაციო გასასვლელ(ებ)ისკენ.

- გ) მის ხელთ არსებული ყველა საშუალების გამოყენებით განახორციელოს ცეცხლისქრობა და მისი ლოკალიზება, თუ ეს არ აღემატება მის შესაძლებლობებს; გამოიძახოს სახანძრო-სამაშველო სამსახური ასეთის საჭიროების შემთხვევაში.
- ზ) ადგილზე მოსულ მაშველებს მოახსენოს საქმის ვითარებისა და მათთან ერთად განაგრძოს ცეცხლის ქრობა. მიაწოდონ ინფორმაცია ხანძრის ჩაქრობის ხელმძღვანელს შენობის კონსტრუქციული თავისებურებების, სათავსებში არსებული ნივთიერებებისა, მასალების ხანძარსაშიში თვისებების შესახებ.

## 11. ხანძრის შემთხვევაში „უნივერსტეტის“ თანამშრომლების მოქმედების წესი

1. „უნივერსტეტის“ ხანძრის ან წვის ნიშნების (დაკვამლიანება, დამწვრის სუნი, ტემპერატურის აწევა და ა.შ.) აღმოჩენის შემთხვევაში „უნივერსტეტის“ თითოეული თანამშრომელი ვალდებულია:
  - ა) შეწყვიტოს სამუშაო, დაუყოვნებლივ შეატყობინოს აღნიშნულის შესახებ სახანძრო-სამაშველო სამსახურს ტელეფონით “112” (ამასთან აუცილებელია დაასახელოს ობიექტის მისამართი, ხანძრის გაჩენის ადგილი);
  - ბ) შეძლებისდაგვარად მონაწილეობა მიიღოს ადამიანთა ევაკუაციაში, მატერიალურ ფასეულობათა გადარჩენასა და ხანძრის ჩაქრობაში;
  - გ) გათიშოს დენის წყაროდან სათავსში არსებული, მასზე განპიროვნებული ელექტროდანადგარები და ხელსაწყოები;
  - დ) მომხდარის თაობაზე შეატყობინოს უნივერსტეტის ადმინისტრაციას, ასევე აცნობოს გარშემომყოფ მოსამსახურეებს;
  - ე) საშიშროების საერთო განკარგულების მიღებისას დატოვოს უნივერსტეტი.

### ხანძარსაწინააღმდეგო ინსტრუქტაჟი

2. ხანძარსაწინააღმდეგო ინსტრუქტაჟი უტარდება „უნივერსტეტის“ პერსონალს, სტუდენტებს. ხანძრის შემთხვევაში ევაკუაცია ხორციელდება დანართით გათვალისწინებული შესაბამისი ინსტრუქციის მიხედვით. თანამშრომლებს სახანძრო უსაფრთხოების ძირითადი მოთხოვნების, ხანძარსაწინააღმდეგო დაცვის საშუალებების, აგრეთვე ხანძრის გაჩენის შემთხვევაში მათი ამოქმედების წესის შესწავლის მიზნით.
3. ხანძარსაწინააღმდეგო ინსტრუქტაჟი ტარდება „უნივერსტეტის“ ადმინისტრაციის ორგანიზებით.
4. ხანძარსაწინააღმდეგო ინსტრუქტაჟის ჩატარება ითვალისწინებს თანამშრომელთა გაცნობას შემდეგ საკითხებთან დაკავშირებით:
  - ა) „უნივერსტეტის“ ტერიტორიის, შენობის, მათ შორის, საევაკუაციო გზების, შიდა და გარე წყალსადენის, ხანძრის შესახებ მაუწყებლობის სისტემების მიმართ დადგენილ მოთხოვნებსა და ადამიანთა ევაკუაციის პროცესის მართვა;

- ბ) ხანძარსაშიში სამუშაოების ჩატარების წესები;
- გ) ხანძრის დროს თანამშრომელთა ვალდებულებები და მოქმედებები, სახანძრო-სამაშველო სამსახურის გამომახების წესები, ხანძრის ჩაქრობის საშუალებები და სახანძრო ავტომატიკის დანადგარების გამოყენების მოთხოვნები.
5. სახანძრო უსაფრთხოების ხასიათის და ჩატარების პერიოდულობიდან გამომდინარე, დადგენილია შემდეგი სახის ხანძარსაწინააღმდეგო ინსტრუქტაჟი: საწყისი, განმეორებითი და მიზნობრივი.
- 5.1. საწყისი ხანძარსაწინააღმდეგო ინსტრუქტაჟი უტარდება:
- ა) სამსახურში ახლად მიღებულ ყველა თანამშრომელს, მიუხედავად განათლებისა და პროფესით (თანამდებობაზე) მუშაობის სტაჟისა;
  - ბ) „უნივერსიტეტის“ სტაჟირებაზე/პრაქტიკაზე მიღებულ პირებს.
  - გ) საწყისი ხანძარსაწინააღმდეგო ინსტრუქტაჟი მოიცავს შემდეგ საკითხებს:
    - ✓ მონაცემებს ობიექტის ხანძარ და ფეთქებადსაშიში პირობების სპეციფიკის და თავისებურებების შესახებ;
    - ✓ თანამშრომლების მოვალეობებს და პასუხისმგებლობას სახანძრო უსაფრთხოების მოთხოვნების დაცვაზე;
    - ✓ ობიექტის ხანძარსაწინააღმდეგო რეჟიმის გაცნობას;
    - ✓ ხანძარსაწინააღმდეგო რეჟიმის დაცვის თაობაზე ბრძანებების, სახანძრო უსაფრთხოების ინსტრუქციების, სამუშაო ადგილზე, საცხოვრებელ სათავსებში მომხდარი ან სავარაუდო ხანძრების ძირითადი მიზეზების გაცნობას;
    - ✓ სახანძრო პროფილაქტიკის ზოგად ზომებს და ხანძრის ჩაქრობაზე მიმართულ ძირითად მოქმედებებს.
- 5.2. განმეორებითი ხანძარსაწინააღმდეგო ინსტრუქტაჟი უტარდება „უნივერსიტეტის“ მოქმედ თანამშრომლებს წელიწადში ერთხელ, პირველადი ხანძარსაწინააღმდეგო ინსტრუქტაჟის პროგრამის მიხედვით. განმეორებითი ხანძარსაწინააღმდეგო ინსტრუქტაჟის დროს მოწმდება თანამშრომლების მიერ ობიექტში დადგენილი ხანძარსაწინააღმდეგო რეჟიმის მოთხოვნების, ხანძრის ჩაქრობის პირველადი საშუალებების, ევაკუაციის გზების გამოყენების ცოდნა. განმეორებითი ხანძარსაწინააღმდეგო ინსტრუქტაჟი ტარდება:
- ა) სახანძრო უსაფრთხოების ნორმატიულ აქტებში ცვლილებების შეტანის და ახალი დოკუმენტების შემუშავების შემთხვევაში;
  - ბ) უნივერსიტეტის ინფრასტრუქტურის, მოწყობილობის, სისტემების მოდერნიზაციის შემთხვევაში;
  - გ) თანამშრომლების მიერ სახანძრო უსაფრთხოების მოთხოვნების დარღვევისას, რომლებმაც გამოიწვიეს ან შეიძლება გამოიწვიონ ხანძარი;
  - დ) სხვა საგანმანათლებლო დაწესებულებაში ავარიების, ხანძრების შესახებ ცნობების მიღებისას;

ე) თანამშრომლების მიერ სახანძრო უსაფრთხოების მოთხოვნების არასათანადო ცოდნის შემთხვევაში;

5.3. საწყისი, განმეორებითი და მიზნობრივი ინსტრუქტაჟის გავლის შესახებ მონაცემები შეიტანება „სახანძრო უსაფრთხოების ინსტრუქტაჟების აღრიცხვის ჟურნალში“ (დანართი N2), იმ პირების ხელმოწერით, რომლებმაც ჩაატარეს და გაიარეს ინსტრუქტაჟი.

5.4. უნივერსიტეტში წელიწადში ერთხელ ჩატარდება ხანძრის დროს პერსონალის მოქმედებების გავარჯიშება შენობის ხანძარსაწინააღმდეგო დაცვის სისტემის ყველა ელემენტის გამართული მუშაობის შემოწმების პარალელურად.

6. პასუხისმგებლობა სახანძრო უსაფრთხოების წესების დარღვევისათვის

6.1. უნივერსიტეტის პერსონალი ვალდებულია მკაცრად დაიცვას დადგენილი სახანძრო უსაფრთხოების წესი და დაემორჩილოს უნივერსიტეტის უსაფრთხოების თანამშრომლის მითითებებს;

6.2. პირის მიმართ, რომელიც დაარღვევს სახანძრო უსაფრთხოების წესებს გამოყენებული იქნება შესაბამისი ზომები.

#### თავი IV. ეპიდემიოლოგიურ საფრთხესთან დაკავშირებული ღონისძიებები

1. ქვეყანაში ეპიდემიოლოგიური საფრთხის არსებობისას უნივერსიტეტი შეასრულებს შესაბამისი სახელმწიფო ორგანოების მითითებებსა და რეკომენდაციებს, საჭიროების შემთხვევაში უზრუნველყოფს სამუშაო ადგილზე მოქნილი სამუშაო რეჟიმის შემუშავებასა და განხორციელებას, მათ შესახებ ინფორმაციის პერსონალისათვის მიწოდებას, ავადმყოფობის გამო შვებულების პოლიტიკის მოქნილობას და საზოგადოებრივი ჯანდაცვის შესახებ მითითებებთან მისი შესაბამისობას.
2. უნივერსიტეტი უზრუნველყოფს:
  - ✓ ხელის დასაბანი ადგილის გამოყოფა თანამშრომლებისა და მესამე პირებისთვის;
  - ✓ ერთჯერადი ხელსახოცებისა და ნაგვის ყუთების უზრუნველყოფა მომხმარებლებისა და საზოგადოებისთვის;
  - ✓ სადეზინფექციო სამუშაოების ჩატარება.
3. საზოგადოებრივი ჯანდაცვის მითითებების შესაბამისად უნივერსიტეტის პერსონალს შორის დაფიქსირებული სიმპტომების შემთხვევაში:
  - ✓ მოხდება პირის იზოლირება და შესაბამის სახელმწიფო დაწესებულების ინფორმირება;
  - ✓ საშინაო ვირუსზე ან სხვა სახიფათო ინფექციურ დაავადებაზე დადებითი პასუხის შემთხვევაში უნივერსიტეტში შეჩერდება სამუშაო და სასწავლო პროცესი ნაწილობრივ ან მთლიანად, შესაბამისი სახელმწიფო დაწესებულების მითითების შესაბამისად;
  - ✓ უნივერსიტეტში ჩატარდება სადეზინფექციო ღონისძიებები;

- ✓ პერსონალის/სტუდენტის/პროფესიული სტუდენტის თვითიზოლაციაში მოქცევის ან კარანტინზე გადაყვანის გადაწყველების მიღებასა და განხორციელებას უზრუნველყოფენ შესაბამისი სახელმწიფო სამსახურები.
- 4. ქვეყანაში საგანგებო სიტუაციის ან/და კარანტინის გამოცხადების შემთხვევაში, სამუშაო პროცესი შეჩერდება ან გაგრძელდება დისტანციურად (შესაძლებლობის ფარგლებში), ქვეყანაში საგანგებო სიტუაციის/კარანტინის გაუქმებამდე და სათანადო პირობების დადგომამდე;
- 5. „უნივერსიტეტი“ უზრუნველყოფს სხვა ღონისძიებების განხორციელებას შესაბამისი სახელმწიფო ორგანოების მითითებების შესაბამისად.

## თავი V. კომპიუტერთან მომუშავე პირების შრომის უსაფრთხოება

1. სამუშაო ადგილს უნდა ჰქონდეს საკმარისი ტერიტორია დამხმარე აღჭურვილობის და ინვენტარის რაციონალური განლაგებისათვის და იყოს მოხერხებული. კომპიუტერი განთავსებული უნდა იყოს გამათბობელი მოწყობილობებიდან არანაკლებ 1.5 მ. დაშორებით და მზის პირდაპირი სხივი არ უნდა ეცემოდეს მონიტორს.
2. დასაქმებული ვალდებულია:
  1. დაიცვას შრომის შინაგანაწესი;
  2. აკმაყოფილებდეს სამუშაოს აღწერილობის მოთხოვნებს;
  3. აკმაყოფილებდეს აღჭურვილობის ექსპლუატაციის მოთხოვნებს;
  4. დაიცვას ამ ინსტრუქციების მოთხოვნები, ელექტრო უსაფრთხოების ინსტრუქციები, ინსტრუქციები ხანძარსაწინააღმდეგო ღონისძიებების შესახებ, ინსტრუქციები საგანგებო ვითარებაში მოქმედების წესების შესახებ.
  5. აკრძალულია: ალკოჰოლის, ფსიქოტროპული, ტოქსიკური ან ნარკოტიკული ნივთიერებების მოხმარება სამუშაო ადგილზე ან სამუშაო საათებში;
  6. იმყოფებოდეს სამუშაო ადგილზე და ორგანიზაციაში, ნარკოტიკული საშუალებების, ფსიქოტროპული ან ტოქსიკური ნივთიერებების ზემოქმედების ქვეშ;
  7. სამუშაოს შესრულება ავადმყოფობის დროს, გაციების, სურდოს ან სიცხის ნიშნების შემჩნევის დროს;
  8. სამუშაოს დაწყებამდე დასაქმებულმა:
    - ✓ უნდა დაიბანოს ხელები საპნით და წყლით;
    - ✓ დაათვალიეროს და შეამოწმოს, რომ მოწყობილობები სამუშაო რეჟიმშია, ელექტროსადენები არ არის გადახლართული, განათების დონე დამაკმაყოფილებელია, შტეფსელები და როზეტები გამართულია;
    - ✓ დარწმუნდეს, რომ ელექტროგადამცემი სადენები არ ედებიან ბასრ და მჭრელ საგნებს. ასევე, ყურადღებას ამახვილებს, რომ არ მოხდეს მაგიდის/სკამის ფეხის დადგმა/გამოდება ელექტროსადენზე, ინტერნეტის და ტელეფონის კაბელებზე;
  9. კომპიუტერის ჩართვისას, დაიცვას მოწყობილობის ჩართვის თანმიმდევრობა.
  10. კომპიუტერთან მუშაობისას დაუშვებელია:
    - პროცესორის უკანა პანელზე შეხება, როდესაც დენი ჩართულია;

- პერიფერიული მოწყობილობის ინტერფეისის კაბელების შეერთება/გადაერთება, როდესაც დენი ჩართულია;
- მოწყობილობების ზედაპირებზე (განსაკუთრებით ეგ.წ. „ქულერთან“) ფურცლების და სხვა საგნების დაწყობა;
- კლავიატურის, ეკრანის, პრინტერის და ა.შ. დასველება;

11. ავარიულ სიტუაციებში:

- ელექტროსადენების წყვეტის, აპარატურაში სითხეების მოხვედრის, დამწვრის სუნის და სხვა გაუთვალისწინებელი სიტუაციისას დაუყოვნებლივ თიშავს მოწყობილობას ელექტროქსელიდან და აცნობებს უშუალო ხელმძღვანელს.
- ნებისმიერი პროგრამული და ტექნიკური ხარვეზის შემთხვევაში აცნობებს უშუალო ხელმძღვანელს.
- მოწყობილობის აალების ან ხანძრის კერის შემჩნევის შემთხვევაში მოქმედებს სახანძრო უსაფრთხოების წესებით.
- უბედური შემთხვევისას დაუყოვნებლივ აღმოუჩენს დახმარებას პირველადი დახმარების წესებით.
- მხედველობის მკვეთრი გაუარესების, ან საგნებზე ფოკუსირების შეუძლებლობის შემთხვევაში, დაუყოვნებლივ ტოვებს სამუშაო ადგილს, ატყობინებს ხელმძღვანელს და მიმართავს ექიმს.
- აცნობებს თავის უშუალო ხელმძღვანელს ნებისმიერი სიტუაციის შესახებ, რომელიც საფრთხეს უქმნის ადამიანების სიცოცხლესა და ჯანმრთელობას, ასევე, მისი ჯანმრთელობის მდგომარეობის გაუარესების შესახებ, მათ შორის მწვავე დაავადებების ნიშნების გამოვლენის შესახებ.

12. სამუშაოს დასრულებისას

- გამორთოს მოწყობილობები ელექტროდენიდან;
- გაწმინდოს მოწყობილობები მხოლოდ ქსელიდან გათიშვის შემდეგ;
- მოაწესრიგოს სამუშაო ადგილი;
- შეატყობინოს ხელმძღვანელს ნებისმიერი გაუმართაობის შესახებ.

**თავი VI. უბედური შემთხვევების აღრიცხვა/მოკვლევის პრობები**

1. „უნივერსიტეტის“ შრომის უსაფრთხოებაზე პასუხისმგებელი პირი ვალდებულია:

- დაუყოვნებლივ მიიღოს პირის სიცოცხლისა და ჯანმრთელობისათვის შემდგომისაფრთხის თავიდან აცილებისათვის აუცილებელი ზომები;
- მძიმე, ფატალური და მასობრივი უბედური შემთხვევებისას დაიცვას სამუშაო სივრცეში უბედური შემთხვევის ადგილი და უცვლელად შეინარჩუნოს იგი კომპეტენტური საგამოძიებო ორგანოების წარმომადგენელთა მისვლამდე, გარდა იმ შემთხვევისა, როდესაც აუცილებელია ზომების მიღება პირის სიცოცხლისა და ჯანმრთელობის დასაცავად ან სერიოზული ეკონომიკური ზიანის თავიდან ასაცილებლად;
- სამუშაო სივრცეში მომხდარი უბედური შემთხვევის შესახებ დაუყოვნებლივ აცნობოს უშუალო ხელმძღვანელს, „უნივერსიტეტის“ შრომის უსაფრთხოების

წარმოადგენელს;

- აღრიცხოს სამუშაო სივრცეში მომხდარი უბედური შემთხვევები და შექმნას უბედური შემთხვევის მოკვლევის კომისია;
- უბედური შემთხვევის გარემოება და მიზეზები მოკვლევული უნდა იქნეს კომისიის მიერ კომისიის შექმნიდან:
  - ა) საშუალო სიმძიმის უბედური შემთხვევისას – 10 კალენდარული დღის ვადაში;
  - ბ) მძიმე უბედური შემთხვევისას – 15 კალენდარული დღის ვადაში;
  - გ) ფატალური უბედური შემთხვევისას – 7 კალენდარული დღის ვადაში;
  - დ) მასობრივი უბედური შემთხვევისას – 30 კალენდარული დღის ვადაში.

**2. საშიში შემთხვევების მოკვლევა.**

1. საშიში შემთხვევების (ინციდენტების) მოკვლევის აუცილებლობას საფუძვლად უდევს ინციდენტის გამომწვევი ფაქტორის დადგენა და განმეორებისაგან დამცავი პრევენციული ღონისძიებების შემუშავება;
  2. საშიში შემთხვევა (ინციდენტი) ეს არის იდენტიფიცირებადი მდგომარეობა (ტექნიკური ინციდენტი, სიმალიდან ვარდნა, აფეთქება, ხანძარი, მავნე ნივთიერების გაჟონვა და სხვა), რომელსაც არ გამოუწვევია უბედური შემთხვევა, თუმცა შესაძლოა იყო ადამიანის დაზიანების რისკი და რომელმაც გამოიწვია მატერიალური ზიანი ან/და სხვა არასასურველი შედეგი.
  3. უშუალო უფროსის და შრომის უსაფრთხოებაზე პასუხისმგებელი პირსათვის აუცილებლად უნდა იქნას მოხსენებული ყველა გარემოების შესახებ, რომელმაც გამოიწვია მოწყობილობა-დანადგარების დაზიანება და გარემოზე უარყოფითი ზემოქმედება.
- 3. ინციდენტის მოხდენის შემთხვევაში „უნივერსიტეტის“ ადმინისტრაცია ვალდებულია:**
1. შეაფასოს ინციდენტისაგან წარმოქმნილი ზარალის ან ზიანის სიდიდე;
  2. შექმნას ინციდენტის მოკვლევის ჯგუფი და ჩაერთოს ინციდენტის მოკვლევის პროცესში;
  3. უზრუნველყოს უნივერსიტეტის პერსონალის თანამშრომლობა ინციდენტის მოკვლევის ჯგუფთან.

სახანძრო უსაფრთხოების წესის დანართი N1

ხანძრის შემთხვევაში პერსონალის ევაკუაციისა და სათანადო მოქმედებების ინსტრუქცია

№	მოქმედებების დასახელება	მოქმედებების წესი და თანმიმდევრობა	შემსრულებლი
1	შეტყობინება ხანძრის შესახებ	სახანძრო-სამაშველო სამსახურის გამოძახება ნომერზე - “112”	პირი, რომელმაც აღმოაჩინა ხანძარი
2	მაუწყებლობა ხანძრის შესახებ	ხანძრის შესახებ ინფორმაციის მიწოდება შენობაში მყოფი ადამიანებისათვის	პასუხისმგებელი პირი
3	ადამიანთა ევაკუაცია შენობიდან	ადამიანების ორგანიზებული გაყვანა ევაკუაციის გეგმის მიხედვით	პასუხისმგებელი პირი
4	ევაკუირებულთა აღრიცხვა	ევაკუირებული ადამიანების თავმოყრა სეციალურად გატვალისწინებულ თავშეყრის ადგილზე, მათი აღრიცხვა, ვინაობის და რაოდენობის ფიქსირება	პასუხისმგებელი პირი
5	ხანძრის ჩაქრობა და ქონების ევაკუაცია	ხანძრის ჩაქრობის სამუშაოების ორგანიზება მისი აღმოჩენის მომენტიდან სახანძრო-სამაშველო დანაყოფის მისვლამდე; შეძლებისდაგვარად მატერიალურ ფასეულობათა ევაკუაცია	პასუხისმგებელი პირი უნივერსიტეტის ადმინისტრაცია
6	სახანძრო-სამაშველო დანაყოფის დახვედრა	სახანძრო-სამაშველო სამსახურების დახვედრა, ხანძრის ჩაქრობის ხელმძღვანელისათვის შექმნილი ვითარების შესახებ ინფორმაციის გადაცემა	პასუხისმგებელი პირი

სახანძრო უსაფრთხოების ინსტრუქტაჟის აღრიცხვის ჟურნალი

სატიტულო გვერდი

საქართველოს საპატრიარქოს  
წმინდა ტბელ აბუსერისძის სახელობის სასწავლო უნივერსიტეტი

სახანძრო უსაფრთხოების ინსტრუქტაჟის აღრიცხვის  
ჟურნალი

დაიწყო: \_\_\_\_\_ 2021 წ. დასრულდა: \_\_\_\_\_ 2021 წ.

ჟურნალის შიგთავსის სტრუქტურა

თარიღი	პირი, რომელსაც ჩაუტარდა ინსტრუქტაჟი (გვარი, სახელი)	დაბადე ბის წელი	ინსტრუქ- -ტაჟი სახეობა	ინსტრუქ- ტორის გვარი, სახელი თანამდებობა	ხელმოწერა	
					პირი, რომელსაც ჩაუტარდა ინსტრუქ- ტაჟი	ინსტრუქ ტორი